



祭輓續錄卷二

祭文

維

康熙五十六年歲次丁酉十一月辛亥朔越祭日  
甲子江南徽州府經歷葉銓謹以羊豕香帛清酌  
庶饗之儀致祭於

皇清誥封光祿大夫內閣中書加十二級景翁項老先  
生之靈曰嗚呼蓮峰疊翠兮練水澄泓山川靈淑  
兮間氣攸鍾篤生太翁兮邦家之楨材質粹美兮  
東箭南金行純德備兮履信懷貞溯翁世系兮奕  
葉清門瑞協集鳳兮祥徵墜鈴幼事制舉兮績學



工文詞豐理茂兮試冠群英為親甘旨兮輟業經  
營明發不寐兮仁孝性成問安視膳兮溫清晨昏  
肯堂肯構兮甲第凌雲撫愛羣從兮視兒姪以一  
情尊祖敬宗兮薦百世之嘗蒸籌畫齋政兮課裕  
商通

御書特賜兮異數欣逢捐修郡學子衛道功崇設立義  
塾兮啓秀發蒙築堤捍水兮蛟鱔徙蹤義田贍族  
兮廩給必均賦質慷慨兮果斷剛明濟人利物兮  
排難解紛四方頌德兮廣譽令聞惟天福善兮大  
啓後昆四枝芳桂兮一本靈椿或居鳳掖兮佩玉  
拖紳或持薦節兮察廉宣風孫曾接武兮奕葉影

纓

詔書寵賁兮極品榮封宜膺上壽兮百祿駢臻何忽仙  
逝兮一旦辭塵嗚呼哀哉銓承乏珂里素仰芳型  
德星遽隕高山宛存臨風惆悵有淚盈襟陳詞設  
奠聊抒微忱翁其降鑒歆此苾芬嗚呼哀哉尚

饗

維

康熙五十六年歲次丁酉十一月辛亥朔越祭日  
甲子江南徽州府照磨所照磨沈煥謹以羊豕香  
帛清酌庶饗之儀致祭於

皇清誥封光祿大夫內閣中書加十二級景翁項太老  
先生之靈曰嗚呼繫我太翁新安華胄奕葉科名  
盈門章綬秉扶輿之淑氣鍾川嶽之英靈文峯峩  
粵武庫縱橫雅量含弘澄波千頃丰裁清峻楨幹  
百尋太丘名德萬石門庭修身晦德不言躬行事  
二親而鄉黨稱孝撫諸弟而友愛克敦才猷練達  
器識超羣紀綱齟政譽望日隆不獨交孚於紳紱

抑且名徹於

宸聰

御書寵錫極品榮封若夫建祠合饗報及百世置田贍  
族惠逮三宗築石隄以捍患設義塾以啓蒙贈賸  
以延渭陽之祀揮金而免城旦之春行義則惟恐  
不及事成而不尸其功至於捐修文廟尤能大振  
儒風繡栱丹甍映奎光而絢采瑤鋪碧砌覩樂舞  
之雍容是則士林之領袖宜爲海內之君公以故  
佑啓後昆雅多俊彥玉孕藍田珠生隋岸卓哉伯  
仲乘時豹變珥筆鸞臺名冠華選持節叅藩勲崇  
屏翰維叔與季競秀聯芳文章經濟紫電青霜孫

曾濟濟天路騰驤長筵胸臆上壽捧觴太翁於此  
悅豫且康袞繡被躬龍章褒德五福三多域中罕  
匹何天不弔忽殞哲人當乘箕尾上爲列星煥備  
員名郡欽挹清光山頽木壞豈不心傷束生芻以  
致奠惟悃悞之是將冀明靈之不昧庶來格而來  
嘗嗚呼哀哉尚

饗

維

康熙五十六年歲次丁酉十一月辛亥朔越祭日  
戊辰江南徽州府歙縣縣丞加一級黃嘉爵謹以  
剛鬣柔毛清酌庶饗之儀致祭於

皇清誥封光祿大夫內閣中書加十二級景翁項太老  
先生之靈曰嗚呼昔人有言雖死猶生夫亦以其  
德業建樹於生時而聲稱傳播於歿後不與身而  
俱逝也彼一事之美一行之良人之相爲慕倣者  
尚咨嗟歎惜於遐棄之日矧德隆業備如太老先  
生者哉余之獲交於左右也憶庚辰春有永河之  
役隨即謁選銓曹適王會公姻翁來會京邸當快

聚之頃道及與太老先生締交有素且備述其道  
德仁義娓娓不倦覺齒頰間有餘馨也余心嚮往  
者久之迨丁亥之春余除授歙貳捧檄南行道經  
廣陵始得與太老先生定交數載景行一旦覲止  
真不啻調飢者之饜飫矣今匏繫歙邑十易星霜  
自愧幹材幸不致墮越是虞者亦惟奉老成爲矜  
式諸如太老生之綱紀兩淮受知於名公鉅卿上  
達於

宸聽疊荷寵賚與夫嗣君之靖共爾位聯轡天衢此固  
遠近聲揚有耳者所共聞也至若篤意於木本水  
源而修築祖塋伐石樹碣繕葺祠宇計遠慮深推

友愛於從父昆季置義田以贍給宗親德音遐播  
於四方惠澤周施於三鄙家庭之內雍雍肅肅孫  
曾詒謀永裕凡此美不勝稱則又得之於令姪漢  
牧先生爲余所稱道者也乙未冬于役薊北越明  
春南旋過揚趨謁太老先生聞人對以疾篤頃即  
遣使致贖至旅寓問遺孰料是夕即捐館舍耶嗚  
呼太老先生之爲善真有惟日不足者矣徽郡黌  
宮歷久頽圯則又首出橐金擇才董事筮日鳩工  
拭目落成以爲六邑興賢育材之地將見科名人  
物自此臻盛太老先生之於賢關聖域屹若金湯  
其功不更偉哉故當尸而祝之俎豆於奕禩即謂

之雖死猶生也可嗚呼尚

饗

維

康熙五十六年歲次丁酉十一月辛亥朔越祭日  
丁卯江南徽州府歙縣典史劉肇基謹以羊豕香  
帛清酌庶饗之儀致祭於

皇清誥封光祿大夫內閣中書加十二級景翁項太老  
先生老大人之靈曰嗚呼天每以純固惇龐之氣  
篤生有道仁人者履仁抱義也守信秉禮也弘濟  
時艱德既備而材無不全也夫是以天生之天必  
眷之而福與壽並隆焉惟我太翁簪纓累葉榮戟  
傳家其事兩尊人也承歡左右就養無方迄於終  
身不忘孺慕撫愛群從昆季更有田荆姜被之風



其承先緒也繼志述事尊祖敬宗建祠葺廟家聲  
丕振世業愈光太翁真無愧亢宗者矣若其善積  
於身澤及於物清猷美譽遍於海內義田贍族則  
如范文正化及鄉人又如王彥方解紛排難則又  
如魯仲連其他梗槩難以枚舉古所謂有道仁人  
者太翁殆以一身兼之是宜天眷誕膺大啓厥後  
家駒國寶濟濟盈庭或鳳池振采或鷹節參藩皆  
學富五車名揚九牧孫曾繞膝並稱偉器固已接  
羽天衢振振未艾茲者年越古稀受

御書尚食之賜享

貶封一品之榮方冀耄耋期頤以登上壽何忽一旦而

仙逝也耶然則太翁之仙逝也其乘箕以返南極  
焉或駕鶴以遊碧落耶抑為川嶽為日星常留純  
固敦龐之氣於天地間耶行見諸嗣君勛階益懋  
華貫九遷於以仰邀

龍章疊贈不惟光被於生前亦且榮施於歿後又况捐  
修郡學功在聖門今將俎豆黌宮名垂不朽嗚呼  
太翁亦可快然無憾矣肇基備員梓里稔被德音  
感有道之云亡悵仁人之不再生芻用薦絮酒陳  
哀尚冀明靈鑒此鄙懷嗚呼尚

饗

維

康熙五十六年歲次丁酉十一月辛亥朔越祭日  
乙丑江南徽州府歙縣街口巡檢司巡檢邢連捷  
謹以剛鬣柔毛清酌庶饗之儀致祭於

皇清誥封光祿大夫內閣中書加十二級景翁項老大  
人之靈前而言曰嗚呼修短隨化曷足悼哉惟有  
懋德生榮死哀仰止太翁篤生美質孝友性成典  
禮叙秩碩德懿行奚能盡述聊舉梗槩千百什一  
太翁之學原本六籍私淑考亭升堂入室蘇海韓  
潮奔馳迅疾屢試冠軍士林傑出尤工書法蘇米  
儔匹斂才就賈運籌洞悉綱紀齷務利興弊黜執

事咨諏

皇恩優恤寵賚有加聲聞洋溢名公鉅卿願交促膝誼切同堂情意稠密怡怡十人同車共食婚嫁喪葬皆為謀畢修葺黻宮賢才興育棖桷重新巍巍穆穆崇祖敬宗睦親贍族拯溺濟荒哀此煢獨無則創興廢皆修復厚禮髦士歲資膏燭交友以信善道忠告內外媵戚恩義尤沃不待有求咸遂所欲贖人子女繼人嗣續媲美古人世欽芳躅其餘義舉數難更僕令德若斯天心素審克享遐齡

誥封極品四世承恩榮真晝錦鄉國分光枌榆藉蔭哲嗣四人熙朝柱石伯仲聯翩早登仕籍不次高遷

台衡虛席叔季英偉如圭如璧孫曾濟美天衢接迹大德獲福理原不易方謂太翁期頤可致胡為去歲溘然厭世素車會弔填咽珂里捷近依德宇素仰令名哲人忽萎疇為法程謹以牲帛藉達哀情靈其鑒此來格來歆尚

饗

維

康熙五十六年歲次丁酉十一月辛亥朔越祭日  
乙丑江南新安衛池州幫督運千總王廷基江南  
徽州營效用把總程亮功謹以瓣香束帛清酌庶  
饗之儀致祭於

皇清誥封光祿大夫內閣中書加十二級景翁項太老  
先生之靈曰嗚呼置藐躬於兩間兮視邦國如一  
人體乾父而坤母兮普萬物而同春是為聖賢之  
學兮理具載於西銘畛域未化兮安能隨在而推  
情惟我太翁兮蹈義履仁睦九族而施惠兮又將  
廣濟乎庶氓道山忽返兮沒世猶有名稱遐邇慕

德兮孰不隕涕而撫心當其曜質三韜兮岳峙川  
渟桂林一枝兮獨秀青雲友冢宰而師名宿兮十  
有五齡就有道於千里兮負笈浙水之濱文如宿  
構兮倚馬即成詞條豐茂兮義府湛深習抱偉略  
兮恥作經生謂科名不可以倖致兮惟篤意於養  
親挾醴筴以治生兮洵籌畫之超倫既聰明而果  
毅兮復篤摯而諄純受知當路兮節使式廬而咨  
詢延攬交遊兮九州著其令聞為兩淮之領袖兮  
覲

天子於南巡奏對稱旨兮異數誕膺蠲逋借帑兮大沛  
德音轉輸由之充裕兮衆業亦以寢興勵媵修而粹美

兮急先務於宗親撫愛羣從兮若連理之田荆視  
猶子如已出兮畢女嫁而男婚葺墓修祠兮不惜  
解橐以萬金當歲荒以贍傭兮兩祠之傑構以成  
復滌溪之家塾兮教子弟以明經資寒畯之膏火  
兮後生藉以成名覩郡學之將圯兮庀梓材以經  
營拓弘規於宮牆兮煥講堂之丹楹致文風之振  
起兮見奎壁之光騰宜其大啓厥後兮皆綰綬而  
影纓伯臺閣而仲屏翰兮合中外以策勲叔季競  
爽兮孫曾復耀其菁英荷

錫命之寵賁兮光耀里門

賜階一品兮四世承恩謂非盛德所致兮豈能享曠代

之殊榮宜長生而久視兮友松喬與錢彭何忽厭  
此塵埒兮駢鸞鶴以上昇余忝世誼兮風景儀型  
嘆哲人之云萎兮傷梁木之已傾嗚呼經世大業  
著於生平黼黻盛治貽諸後昆名垂不朽雖亡若  
存奠以生芻痛悼彌深惟靈昭鑒來格來歆尚  
饗

維

康熙五十六年歲次丁酉十一月辛亥朔越祭日  
乙丑江南徽州營存營右軍把總李應福謹以剛  
鬣柔毛清酌庶饗之儀致祭於

皇清誥封光祿大夫內閣中書加十二級景翁項太老  
先生之靈曰嗚呼太翁盛德之淵涵也緬懷懿行  
未易僕數而德之彰彰昭人耳目間者真令人追  
維不置也如太翁之嚴以持躬寬以及物布慈祥  
而稱愷悌者其德也仁公以持世廉以居心臨大  
事而莫可撓者其德也義至若卑以自牧謙以接  
人世共稱為嚴翼之君子也其德也禮明於燭物

名軒錄卷三  
指於保身人共仰爲哲人之在望也其德也智且也千金在於一諾歷久不異崇朝其德也信世即有抱道厥躬潛修閭里者未有若太翁之德之兼且備也由是德厚流光善錫其類朗陵之才子等於高陽西京之門閭真同萬石恭遇

聖德作人廣開興賢之路宏猷遐播悉在充閭之英固已彬彬郁郁一時稱盛矣前此

皇上南巡特眷老成太翁得備

顧問受

御書克食之賜洎遇

特典賜階一品贈及三代太翁身被殊榮光前裕後非

甚盛德何以臻此使我太翁而樂享遐齡於以益崇盛德衍慶垂休寧有紀極奈何上天不惠遽喪哲人徒令被德者失所倚恃慕德者仰止無從豈不大可傷也已嗚呼青松幽隧長留京兆之阡白馬佳城將掩滕公之室如聞磬欬恍接神儀雪涕徒勞徬徨難已不自知其言之不工亦聊以寫我心之哀慕也嗚呼尚

饗

維

康熙五十六年歲次丁酉十一月辛亥朔越祭日  
丙寅江南徽州營存營右軍把總李得富謹以剛  
鬣柔毛清酌庶饗之儀致祭於

皇清誥封光祿大夫內閣中書加十二級景翁項太老  
先生之靈曰嗚呼日臨庚子讖合巳辰賢哲道喪  
疇不沾膺憶公去歲卒於揚州江表千里道里阻  
修素車漬酒欲赴無由今茲歸殯得與執紼載瞻  
旌旒願一誅德猗歟我公言坊行表西漢君宗東  
都有道自公少日早負聲望學如賈董文則班揚  
青芝赤箭賦材維良天球大貝宜薦明堂賢良之



對天人之策公才則豐公遇則嗇心如春草惟戀  
春暉采蘭之養願早及時乃棄筐篚維揚是宅櫛  
風沐雨善殖其業孝事二人奉養斯隆有甘有旨  
有釜有鍾春秋窀穸膾臘享祭慎終追遠罔不盡  
禮焄蒿悽愴終身弗替推其至性施惠必周內而  
宗鄙外而交遊人之庇之不啻覆幬脫手千金或  
無半面出人罪罟不使終陷數若牛毛豈名一善  
慨彼世風波流東靡豈無他人錢刀是利日夜持  
籌遑知好義公起挽之屹若砥柱宜其錫類大啓  
後人鳳毛麟角振振繩繩策名委贄印綬盈門公  
被

錫命袞衣一品

贈及四世光耀鄉郡公有嘉謀嘗備

顧問佐時轉輸頗見忠蓋公雖依隱未仕於朝夔龍丘  
壑抱道何高計公之齒初逾杖國視聽神明朱顏  
悅澤方期遐壽繼彼彭篋何為厭世館舍遽捐嗚  
呼以公獨行宜列惇史崇德報功瞽宗有祀不朽  
之名庶幾在是矧夫繼述家有多賢公皆得之又  
何憾焉惟余在昔曾庇廣廈碩果不留一朝徂謝  
言念儀型心悲曷寫牲帛敬薦酌以清醴公乎不  
昧來降靈旂嗚呼尚

饗

維

康熙五十六年歲次丁酉十一月辛亥朔越祭日  
丁卯原任徽營防府歙城守右軍把總黃應龍謹  
以剛鬣柔毛清酌庶饗之儀致祭於

皇清誥封光祿大夫內閣中書加十二級景翁項太老  
先生之靈曰嗚呼山川靈淑之氣恒磅礴於兩間  
而賢傑之士稟其氣以挺生是必有偉材俊德爲  
世羽儀聲施區夏然而盱衡今古思得其人亦未  
數數見也吾鄉黃山高有千二百丈其白嶽則聳  
立三百仞竒峰插天重崖夾峙山西北類太華峭  
壁削成煙巒無際水有豐樂浙源漸溪丹井山川

靈淑甲於寰區先生實產是鄉是殆秉間氣而挺  
生者乎先生門蔭高華天資穎異幼工文章博洽  
典籍凡海內名公鉅卿一與識荆相見恨晚會世  
業中落爲侍養晨昏不能決科射策遂投筆而思  
曰大丈夫不能挾蓬矢以射四方徒跼蹐轅下無  
庸也迺挾計然之術治鹺維揚以驚起颺發之才  
致煙海剽車之溢席豐履厚亦足自豪然跡其生  
平提躬醇謹言矩行規雖處素封絕無驕吝而網  
紀齟筮幾四十年殫厥嘉謀急公是務持節之使  
旣倚爲策著即

聖主南巡亦復采納其言爰沛

德音緩征借帑遂得抒積年之困紕裕今日之轉輸是  
非先生非常之才曷能調劑盡善以至於此乎至  
如崇祖敬宗入孝出弟三宗待以舉火九族潤其  
洪流而且拯災恤患飯及鬻桑拚骼埋齒仁施廣  
柳揮千金如敝屣重片諾若丘山有善不矜有功  
不伐此又先生好行其德故能隨事博施必臻其  
極若先生者是殆曠世而間出者矣方冀先生壽  
同金石爲國紀爲人瑞樹東南之文獻作後生之  
楷模奈何一旦厭世而遂返道山也耶嗚呼傷哉  
雖然膏沃必光根厚必發以先生之積累慶澤濬  
發長源固已佑啓後人克昌其世長公紫薇視草

祭輓詞卷二  
奏績巖廊次公黃堂佐郡晉階觀察其餘叔季二  
君與孫曾多輩皆器美瑚璉號稱國寶一門四世  
鵲起蟬聯於以羽儀

王國黼黻太平舉先生未竟之緒而更張大之吾知其  
未有艾也矧聞先生生膺

錫命貴擬公僚歿祀瞽宗光昭典禮庶幾在天之靈且  
與山川靈淑之氣恒磅礴於兩間歷大化而相爲  
終始又安得以人世徂謝之端重爲先生悼哉獨  
是應龍生同桑梓德宇是依碩果忽凋典型歌絕  
生芻薄酌曷罄哀誠不自知其涕泗之橫集也尚  
饗

維

康熙五十六年歲次丁酉十一月辛亥朔越祭日  
戊辰江南徽州營防府歙城守右軍把總張高魁  
謹以剛鬣柔毛清酌庶饘之儀致祭於

皇清誥封光祿大夫內閣中書加十二級景翁項太老  
先生之靈曰嗚呼向秀聞山陽之笛而泣然興哀  
羊曇過西州之門而潸然出涕蓋泰山其頽吾將  
安仰哲人云萎傷如之何語云天道無親常與善  
人此言天不相負也以我太翁之德之才如大呂  
之含音如太阿之斂鏗積厚者流光其膺懋祉享  
大年也固宜若之何尚未望耄而悠然長逝耶吾

竊有惑於與善之理矣若翁之篤門內睦婣黨人有犯而不校已有善而不矜履險難而如夷處富貴而好禮他人之所難者而翁克全之固其蓄也深故其發也遠其發也既於其身而更於其子若孫觀其一傳繼武僅少荀氏之二龍再傳森立待增瀛洲之三士三傳奕葉已逾燕山之五桂青箱玉樹繩繩振振簪纓鼎列象笏充庭見有珥筆鳳閣者矣袖拂爐煙囊珍璧月伊惟長君也見有宣猷上郡者矣五馬按部雙鴈隨軒伊惟次君也見有籍通丹桂兆應芙蓉名冠辟雍蜚聲國學伊惟叔季二君也其他皆鳴鳳之選石麟之瑞階盈芝

葢里號鳴珂天固無負於翁且與之以厚矣而又何惑乎矧翁已受光祿大夫之封後此

綸綍頻仍正未有艾雖歿之日猶生之年吾知翁且爲不朽之人又何以怛化爲哉高魁忝附粉榆夙深仰企今以丹旒載塗靈輻還葬不禁零涕敬陳薄奠用寫哀誠靈其有知庶幾來格尚

饗

祭輓續錄卷二

祭輓續錄卷三

祭文

維

康熙五十六年歲次丁酉十一月辛亥朔越祭日  
戊辰年家姻晚生程喈率男晚學生崑生崧生孫  
壻華生謹以剛鬣柔毛清酌庶饗之奠致祭於  
皇清誥封光祿大夫內閣中書加十二級景翁太姻臺  
項老先生之靈而言曰嗚呼山頽喬嶽星隕台微  
人多祝頌天不憖遺楹夢旣設相杵誰施閭里罷  
春縉紳廢社緬想哲人靡不哀者矧屬戚末心悲  
曷寫翳惟我公德如金玉日星爲昭才則錦繡鉅

細畢該翊贊遠猷國計是賴出其緒餘不動聲色  
如海潤物百川朝宗不有盈竭惟見宏冲如山出  
雲普天澤被收斂神功不言美利綢繆風雨先後  
廿年朝野咸欽遠近具瞻昔我先子金蘭結契握  
手蕪城相視莫逆仔肩庶事多藉匡維晚年息機  
猶切思惟公多哲嗣英英蔚起名重藝林紆曳青  
紫維喈不才謬荷春風雷陳締好三世誼隆聞摧  
梁木潸然出涕化鶴人歸乘虬客去傳說箕尾昌  
黎帝鄉千年如在何間存亡四俊趨庭諸孫繞膝  
五福箕疇罔闕其一

皇恩下逮四世貤封錫賚便蕃奕世光榮崇德累行望  
隆學校行祀瞽宗春秋匪懈素車白旒來自邗江  
吳山越水道阻且長薤露之歌蒿里之曲聞者摧  
心見者愴目嚴冬氣冽閭闔風淒公返天路尚攝  
緋衣朝霞崢嶸沆瀣淅瀝公御天筵尚善飲食百  
齡有盡令聞無窮音容旣謝堂斧將封公靈不泯  
克昌令子纍纍若若師師濟濟炙雞絮酒盼嚮遙  
臨敬陳觴奠鑒厥哀忱嗚呼尚

嚮

維

康熙五十六年歲次丁酉十一月辛亥朔越十有  
三日癸亥眷晚生王崑王焯王堅王旭王長祚王  
璧謹以剛鬣柔毛清酌庶饁之儀致祭於

皇清誥封光祿大夫內閣中書加十二級耐菴項太先  
生之靈曰維先生之挺生兮實間氣之所鍾抱內  
美而流輝兮譽四馳而有終孝行侔於曾史兮永  
錫類於無窮惠澤周於三黨兮咸載揚夫休風姱  
修庠於純懿兮峻如山斗之崇隆偉量汪汪若干  
頃兮汝南遜其事功身江湖而心廊廟兮褒寵降  
於



九重親哲嗣之通顯兮崇階晉乎上公宜荐登夫上壽  
予將賓友夫偃儻胡昊天之遽奪兮遠近失其君  
宗形雖蛻而名終不隕兮洪惟德之獨豐人生亦  
莫不皆然兮能備五福者厥惟我公義正夫古人  
之首丘兮埏隧吉而龜筮協同撫靈車而執紼兮  
僉掩抑而悲恫執牲牢而祖奠兮孰云涕之無從  
神憑式而降鑒兮異樂康兮雲中哀哉尚

饗

維

康熙五十六年歲次丁酉十一月辛亥朔越祭日  
癸亥年家眷晚生吳文燿張漢江應珂吳萬斌洪  
名播張兆祺吳士曜程禮張聖浩江肇鳳殷騏等  
謹以羊豕香帛清酌庶饘之儀致祭於

皇清誥封光祿大夫內閣中書加十二級景翁項老先  
生大人之靈曰嗚呼浴景騰瀾練江則素波萬頃  
干雲表秀蓮嶽則青嶂千重維偉人之燿質本間  
氣之所鍾係新安之文獻樹江左之儀型懸河在  
口列宿羅胸汪洋學海萃律詞峰才吳鈞而越砥  
器金鐘而大鏞幼振采於藝苑技早擅夫雕龍爲

各車錄金卷三  
二親之孝養爰屈志而經營運籌發策明敏不羣  
用從體出智與誠融能當大任聲譽日崇非獨推  
重於同輩抑且傾倒於鉅公冠蓋四集簪紱盈庭  
通齏裕國名達

宸聰

御書克食賜賚攸隆綜太翁之懿行孝父母而敬祖宗  
葺先祠以弘饗祀設義塾以迪羣蒙甃石成堤捍  
山溪之水患置田贍族給貧乏之飧饗待朋友而  
必信御臧獲而有容恩周戚黨惠洽鄉人彥方範  
俗魯連解紛仁心為質義問無窮齊太丘之芳軌  
並少伯之高蹤覩郡學之傾圮復捐橐而鳩工煥

聖宮之榱桷洵不朽之洪功篤生哲嗣焜燿裘弓  
或鸞坡而視草或烏府而乘驄塤篔簹媲美花萼聯  
芬較荀龍而得半擬薛鳳而逾豐孫曾挺秀蘭玉  
成叢繩繩濟濟閱登閔克昌厥後移孝作忠幸  
遇

朝廷之特典旋邀三代之榮封古稀矍鑠袞繡被躬造  
浚郊其有駟占渭水之非熊宜洊臻於耄耆將注  
算於喬松歎靈光之易息溘邁疾而長終世與道  
兮交厄理若數其焉憑嗚呼哀哉文燿等幸依德  
宇夙被仁風載瞻素旒悲切五中悼老成之既喪  
望提命以無從酌椒漿而灑泣裁蕪誄以抒悰托

明信於祝史冀薦陳於幽宮諒靈爽其鑒格恍雲  
馭之降空嗚呼哀哉尚

饗

維

康熙五十六年歲次丁酉十月辛巳朔越祭日巳  
丑年家姻晚生江天慶率男姻晚學生挺生運生  
謹以剛鬣柔毛清酌庶饗之儀致祭於

皇清誥封光祿大夫內閣中書加十二級耐菴項太親  
翁之靈曰嗚呼太親翁竟溘然而長逝也耶雖然  
人生如寄百年特瞬息間耳彼碌碌無竒與草木  
同腐者固無足論即稍稍有所樹立名不聞於海  
宇業不著於當時才不足以超邁人羣德不足以  
流傳後世亦無以動鄉里之悲思極人心之感悼  
也若我太親翁豈可同年語哉太親翁生自望族

幼聰穎讀書一目數行弱冠遊學武林與冢宰徐公同硯席業師張公竒其才勵以舉子業太親翁非不欲奮志青雲而奈以高堂甘旨為念因北渡邗江經營鹺務由是五十餘年兩淮藉為梁棟太親翁一身肩之弗倦也

皇上南巡太親翁率眾陳言邀

恩免贏餘為兩淮休息既復領帑為兩淮培養元氣誠千古難必之遇人生希有之榮也太親翁生平持已端介居躬勤慎尤以儉教家人無聲色之樂無奢侈之習至於置義田新家廟修學宮則又不惜金錢以垂不朽而且敦族誼厚交遊有才者成全

之不足者周給之又未可一一指數也太親翁生丈夫子四人長君經士親翁才同班馬業寄縹緲珥筆鳳池望重臺閣仲君書存親翁佐郡有聲進階屏翰三君養初親翁四君仰山親翁英年偉抱接武雲霄諸孫玉立皆經世才蟬聯鵲起寧有既耶况太親翁登上壽備五福晉

榮封凡生人之所不可必得者而無弗得焉是孰有如其名孰有如其業孰有如其才孰有如其德者哉其鄉里之悲思人心之感悼當何如也晚忝附葭蘿固知之最詳而言之愈慟嗚呼典型云謝梁木其頽雲山修阻牽帷莫及迴憶音容能不臨風而

洒涕乎嗚呼尚

饗

維

康熙五十六年歲次丁酉十一月辛亥朔越祭日  
甲子年家眷晚生汪俊孫夢錫吳肇裕周廷亨程  
正印畢天樞程潛吳邦浩許德標方士源孫文昊  
胡樓呂承壘吳棠等謹以剛鬣柔毛清酌庶饗之  
儀致祭於

皇清誥封光祿大夫內閣中書加十二級耐菴項太老  
先生之靈曰嗚呼先生純孝之君子也孝為百行  
之源其源既深則其流自洋溢充滿而無所紀極  
河之發於崑崙莫測其深故由積石而龍門而砥  
柱凡經閱數千里而沾其潤漑者雍冀兗豫數州

之地水固有之德亦宜然人之能孝於其親者未  
有不由一本而推暨於萬殊者也先生盡色養之  
孝於兩尊人俱能得其懽心咸臻壽考及夫喪葬  
祭享孺慕之思至老彌篤非純孝而何群從昆季  
皆曲為愛護不令其有一人失所此德之基於門  
內也溯而上之旁求遠代祖塋樹以碑碣且繪圖  
藏之防失守也建葺統宗祠宇置產以隆祀享此  
德之能報本追遠也設義田賑貧乏於嫁娶則有  
助於殯葬則相恤此德之周於族黨也築長隄捍  
水患此德之逮於里居而行人兼濟也生平之善  
豈易更僕數乎雖然先生之好行其德固本於天

性而亦未始不由於學也從來學必衷諸賢聖而  
功夫務切於身心先生獨契朱子近思錄手不釋  
卷而於當年講堂遺址重加創構俾族之秀良子  
弟誦習其中是其學必以先賢為準的也且於先  
聖之宮牆尤加崇重前此邑庠修葺先生首捐橐  
金而明倫堂文公祠俱襄其美近復興建郡庠明  
倫堂櫺星門一切傾頽漫漶之所皆從輝煥是其  
學又以先聖為遠宗者也而書翰文詞乃先生之  
餘技耳夫德因學而益增學因德而愈顯且世德  
相承家學裕後哲嗣俱筮仕有聲以增前人光要  
皆先生之所以全乎孝也今將俎豆於文廟幾足

以慰在天之靈爽而垂休於奕禩矣俊等知交有素仰企芳型相將陳哀誄而荐椒馨先生其不以言之或謬而歆此几筵歟嗚呼尚

饗

維

康熙五十六年歲次丁酉十一月辛亥朔越祭日  
戊辰眷晚生方肇經謹以清酌楮帛之儀致祭於  
皇清誥封光祿大夫內閣中書加十二級景翁項太老  
先生之靈曰維黃山之毓秀兮覩賢杰之挺生承  
累葉之慶澤兮又重之以修能勝衣早習筐篋兮  
腹笥博洽夫九經試郡縣而冠軍兮噪藝苑之宏  
聲念高堂其遲暮兮意獨急於養親謂科名不可  
以立致兮乃挾策而治生宅維揚以創業兮煥堂  
構而肇興酬奉養於三釜兮孝行表於百城尊祖  
敬宗兮肅百世之嘗烝睦親收族兮三宗分其倉

困存心主於忠信兮重然諾於平生人受恩而不  
求報兮已有德而弗矜運籌發策兮殫心計之獨  
精一言中節兮息衆議之盈庭九州欽其令聞兮  
當宁亦識其姓名宜其蔚爲時望兮作淮海之長城訓  
義方於哲嗣兮皆綰綬而影纓被

馳封而尊貴兮若萬石之門庭期福履之無疆兮如川  
至而日升胡昊天而降奪兮歎斗南之隕星嗟小  
子之生晚兮心久切於景行痛典型之遽喪兮能  
不隕涕而拊心叩總幃而陳奠兮藉椒醑以薦馨  
奠九原之昭格兮庶來享而來歆嗚呼尚  
饗

維

康熙五十六年歲次丁酉十一月辛亥朔越祭日  
丁卯年家姻晚生畢德文率男晚學生兆麒兆麟  
孫廷珍廷琯廷瑜謹以剛鬣柔毛清酌庶饗之儀  
致祭於

皇清誥封光祿大夫內閣中書加十二級景翁項太姻  
翁老先生之靈曰嗚呼自我太姻翁之逝也縉紳  
爲之罷社閭巷爲之輟舂及歸殯於故山也白馬  
素車闐咽珂里總經會葬蓋有萬人莫不感悼悲  
哀謂天不憖遺一老以砥狂瀾而維薄俗矧誼屬  
姻盟因依尤切其能不望丹旌而墮淚執素紼以



拊心也耶太姻翁門蔭高華天資英偉少工制藝  
小試屢冠其羣挾其器能固不難芥拾青紫乃以  
尊贈公春秋既高需養方急不得已而棄儒治生  
櫛風沐雨創業邦溝卒致三釜之養州閭稱孝焉  
自其綱紀兩淮幾四十年發策持籌洞若燭照繡  
衣之使皆深相引重事無大小咸倚裁決會  
聖駕南巡首陳商困緩徵借帑獲邀

異數公私至今賴之其在家庭鄉曲敦孝友崇禮讓隱  
然以一身樹人倫之望睹宗祠之傾圮則獨力修  
葺見堤堰之衝決則捐金增築值年歲之凶荒則  
行贍傭之法以救災愍貧寒之莫支則置義田之

租以贍給凡一切濟人利物陰受其惠者指不勝  
屈更念郡庠爲六邑育才之地年久將傾明倫堂  
且廢爲灌莽師儒講肄無所乃力爲經紀撰日興  
復雖所費甚奢而毫無吝惜輪奐重光視舊有加  
此則太姻翁樂在名教儼然以振起人文爲已任  
者也有才子四人時以義方相訓督今諸姻翁或  
職掌絲綸或持節觀察或策對天人或聲蜚璧沼  
爰及孫曾揆藻摘華紆朱拖紫一門之內振振蟄  
蟄方諸西京萬石不啻過之致膺

特典榮封四世俱階一品

恩華優渥賁盛莫加非太姻翁之盛業光前詒謀裕後

孰克臻此乎德文荷蒙不棄猥以弱息奉侍文孫  
箕帚至戚往來情好最密方期太姻翁角巾歸里  
開耆英之社爲山澤之遊庶得追隨杖履長奉教  
言奈何一旦厭世遽返蓉城典型凋謝之痛其何  
能已然惟太姻翁盛德大業生則朝野稱之歿則  
公卿誄之報功有祀俎豆泮宮獨行有傳丹青惇  
史方且昭垂穹壤歷千秋而不朽矣而又何恫乎  
敬修薄奠少展私誠或不以禮儀未備尚冀降鑒  
而歆之也嗚呼尚

饗

維

康熙五十六年歲次丁酉十一月辛亥朔越祭日  
己巳年家姻晚生吳孔荼率男維祺維禔等謹以  
剛鬣柔毛清酌庶饌之奠致祭於

皇清誥封光祿大夫內閣中書加十二級景翁項太老  
親臺之靈曰嗚呼笙鶴浮空緱嶺有昇仙之客河  
山滿目黃壚多感舊之人翳賢哲之淪亡歎典型  
之消歇所以一聞凶訃魂銷芍郡之花迨乎千里  
歸喪泪溢練江之水猗歟我公東箭呈材南金曜  
質珥貂列棨晉司馬世閥高華義府文宗唐徵士  
家風清劭爲南軒之高弟學究天人偕東海之巨

卿交深研席孫弘十道是宜詔舉賢良左思三都  
固已名高京洛乃以愛日情殷采蘭念切謂科名  
發迹未可倖邀而濛汜餘光恐其已迫韜濟時之  
偉器試策於計然屈震世之雄才追蹤夫膠鬲治  
生是急貿遷亦本詩書會計獨能貨殖悉衷仁義  
三釜養志孝比子輿五綵承懽情逾楚老寢門之  
禮中外洵無間言廬墓之誠道路皆爲感歎占來  
吉壤不須指自仙人夢得佳城共說徵諸冥感而  
且追遠上及百世報本遙溯千年跋履山林尋廢  
壠於陵谷變遷之後訪求都市購先像於兵火散  
失之餘松檟蔚然不啻新封馬鬣丹青煥若永教  
什襲寶藏出粟贍傭兩祠皆成傑構築隄捍水千  
家咸賴安居潤比長河被澤者已徧九族廣如厦  
屋受庇者詎止萬人甚至注意膠庠爰興土木棖  
題百尺宮牆於以改觀佾舞兩階禮樂爲之增盛  
是誠士林圭臬可稱名教干城所以福集於躬慶  
延其世策名天府伯珥筆而仲參藩揆藻詞壇叔  
鳳觀而季虎視遂得上邀

特典榮被

馳封紫綬緋魚貴擬公僚之秩朱顏綠鬢健同陸地之  
仙方異仁人荐登上壽豈謂祝鳩之日遽驚具襍  
之辰茲者祖奠載塗靈輻旋里素車填咽多臨郭

泰之喪白馬鳴號將啓滕公之室然而鄉閭睦德  
使者采風祀以瞽宗用舉明禋之典闡其獨行永  
昭簡冊之光是公之形骸雖與物而委化而公之  
名譽歷奕禩而無窮荼也自分弱蘿幸依喬木奉  
遊好於疇昔獲遂因依感徂謝於今茲空懷悲悼  
束芻陳奠冀有鑒於降神援筆告哀媿無文以製  
誄嗚呼一抔高冢痛埋玉以奚堪百尺豐碑想生  
金而可待矢高情而弗諼縱閱世以難忘嗚呼哀  
哉尚  
饗

維

康熙五十六年歲次丁酉十一月辛亥朔越祭日  
乙卯愚表弟宋兆謹以剛鬣柔毛清酌庶饗之儀  
致祭於

皇清誥封光祿大夫內閣中書加十二級耐菴尊表兄  
之靈前而言曰嗚呼哲人其萎遐邇悲傷自我不  
見再易星霜維公懿行器重珪璋人倫標準鄉國  
表坊年尊更老道重園黃躬被榮寵朱芾斯皇匪  
直也人邦家之光余叨中表自幼趨蹌朝夕提撕  
薰德沐芳飲食教誨寤寐勿忘天佑我公奕世其  
昌五福具備歷久彌慶胡爲厭世遽返天閭追維

疇昔涕泗傍徨靈輻載駕撰日維良佳城既啓白  
馬告祥豐碑表德鉅筆輝煌公雖徂謝令聞愈彰  
臨風執紼敬奠一觴靈兮不昧來格來嘗嗚呼哀  
哉尚  
饗

維

康熙五十六年歲次丁酉十一月辛亥朔越十有  
五日丙寅內弟王萬甸謹以剛鬣柔毛清酌庶饗  
之儀致祭於

皇清誥封光祿大夫內閣中書加十二級耐菴項公尊  
姊丈之靈而言曰維公之先奕葉熙隆我公篤生  
丕顯休風早著令名永譽克終才高藝苑文若雕  
龍惠施溥博澤蔭無窮鄉邦流頌朝野推崇秩躋  
一品階比三公旬託內戚叨獲餘榮長家克世厥  
惟公功先人壙隧尤賴重封銜恩未報中心慙慙  
胡天不弔奪我君宗拊心內悼追仰無從臨岐執

紼告此哀哀哀哉尚

饗

維

康熙五十六年歲次丁酉十一月辛亥朔越十有  
七日戊辰愚孫壻程大英謹以剛鬣柔毛清酌庶  
饗之儀致祭於

皇清誥封光祿大夫內閣中書加十二級耐菴項公尊  
太岳之靈前而言曰嗚呼天柱峰摧少微星墜杖  
履空存泉壚永閔猗與太岳鄉邦衣被行邁等夷  
奮興百世河潤九里三黨霑漑厦屋萬間人皆受  
庇生爲國寶歿從社祭人倫碩望朝野攸繫英屬  
甥孫獨加垂意重締嘉姻復爲孫壻勗以詩書示  
以道義卯闡幸雋計偕附驥比拜階除期以遠器

愧英不敏未能奮翅去春聞訃襟沾淚漬擬赴臨  
哭道遠莫致想像音容時形夢寐今當卜隧靈車  
結轡椽筆書銘豐碑巋巋懿德如縷喙奚容寘惟  
茲永訣感深息隸臨岐執紼跼陳一解敬告哀衷  
伏希神醉嗚呼哀哉尚  
饗

維

康熙五十六年歲次丁酉十一月壬子朔越祭日  
庚午愚叔巽愚兄志發愚弟嘉福福來道美道汝  
辰道成志達嘉琳起基伯駿嘉舒嘉牲士賢道深  
茲勇兆琰起堂伯雄嘉悅道漢運有愚姪文儀岳  
文旭玠聯璠聯璋鳴鑿佩敷文昭周兆周芳循良  
錫朋錫祚鴻度昌時埉達長孫立奎嚴諺炳文龍  
存恕鳴臯聯球志積志浩志扶志增周豫廷龍允  
文立臯立岳煩驚珎來豫立喜立正周夜周夏長  
柏關孫茂森銘鳳來仲立俊日銓振貞攀麟壽聯  
璜周瑞周音長沸長森長潤來慶日偉天恩善孫

來悌觀旦樂壽超日恒愚姪孫長瀛光世維徵菁  
泰階文炳廷明仁秀日夏善辭道源維御巨源樹  
名樹臣慶蕙英賢洪義華慶蓉慶蘭洪仁萊薇二  
九本敬六十慎寧洪智彬俊秀慎言上壽詞源添  
壽萱慶莊世輝之麟維雄萑觀明偉秀一伍源清  
夔本誠多孫憲文承恩兆駿佐賢三喜仕賢廷順  
廷蕃觀恩愚曾姪孫大振逢暉觀應逢琳廷讓世  
耀儷世振思永世泰逢泰忠仁權思訓天竒天瑞  
迺益伸湛正元福兆思臣應鼎弘幹盛枝弘極愚  
元姪孫起甥七貴嗣曠璿愚又元姪孫鼎增等謹  
以剛鬣柔毛清酌庶饗之儀致奠於

皇清誥封光祿大夫內閣中書加十二級耐菴老姪之  
靈前而言曰嗚呼老姪闔里所欽我儀型之是為  
完人天之所生莫負厥命盡性踐形希賢希聖匪  
敢曰聖立心則正其他勿論根本是篤百川一源  
爰及宗族上念宗祖凡數十世敬恭將事有光無  
替振振百支其麗不億親親賢賢是覆是庇百爾  
所為惟力是視承前啓後栽培樂育過則可容善  
無不護侃侃之氣汪汪之度凡我鄉邦咸受其福  
甲寅之歲亂離間阻僑居廣陵在江之滸晤語維  
艱弗克竝處肫肫之誼不忘故土每一來歸懽樂  
以聚去年之春降災二豎嗚呼老姪倏然以逝瞻



彼歲星其隕如雨嗟我族人依於何所行不歌謠  
春不相杵吾知老姪生死勿計豪傑挺生建功豎  
義綱紀斯民人倫之至而况老姪五福具備壽考  
令終夫亦奚愧作善降祥自應錫類其類維何擔  
爵在位廊廟之林公輔之器矧乃諸孫書香是繼  
森森玉立顯榮無既惟我族人曷勝瞻企幸值嘉  
辰旋車返旆敬率吾宗恭申奠祭惟靈在天酹酒  
在地不腆之儀故鄉之味神之鑒之尚其來莅尚  
饗

維

康熙五十六年歲次丁酉十一月辛亥朔越祭日  
庚午愚兄志發率男姪其祥其位其祿孫姪孫理  
孝理悌理齊等謹以剛鬣柔毛清酌庶羞之奠致  
祭於

皇清誥封光祿大夫內閣中書加十二級耐菴老弟之  
靈曰嗚呼魯衛宗均康叔之因心尤摯人琴響寂  
王猷之傷逝更深嗟惟吾弟神明俊峙志度淵激  
早受宰輔之知遂膺國士之眷鴻都賓客樂與交  
遊虎觀儒宗昔通簡翰言揚事立實至名歸吾弟  
之寓籍維揚者五十餘年淮南財賦半濟軍需先

後持節之使皆丰裁嚴峻吾弟襟懷落落未嘗求  
合繼則心寫交若布衣政事之張弛無不折節咨  
度倚爲祭酒弘農之任公孝坐嘯稱理南陽之知  
孟博畫諾無尤蓋因明敏以度時和敬以集事雖  
朱白之善籌孔卓之巨室無寧以旣載而棄輔故  
皆受成於吾弟未嘗分他鑣而均茵伏也自滇閩  
鳴張芻輓時增

翠華南巡省方省歲吾弟時從

輦路奏陳商困

上嘉其籌畫悉蠲逋賦數且百萬更貸

帑金以裕轉輸此中朝大議所難矜論者何庶言之入

告遂得沛殊常之澤也勝國吾族方競宗祠制度  
弘敞歷久材敝羣憂几筵之失序而莫克勝任也  
吾弟捐金鉅萬三年落成鐘簾不移神人胥悅夫  
闕宮有洫且碩詠於奚斯寢成孔安是虔頌於殷  
武國猶爲美家實難能歲在乙酉二儀匿曜百川  
沸騰家室淪胥周行斷絕今重隄拒浪壘砌環流  
瓠子之間閭不殫武陵之阡陌交通飛閣凌波津  
亭毓秀非吾弟之荒度以成厥功安能復廬井之  
舊觀而使行李樂出於途哉吾郡耘石耕山稼而  
少穡載離兵燹室若磬縣吾弟惠鮮鰥寡孤嫠無  
杼軸之空敷叙宗盟尪羸免餅壘之罄故懷德者

比廬歸仁者載路胡乃河潤方深冬溫遽暮國僑  
致慟於罕皮無爲爲善羊肸追慨於隨會其誰與  
歸然而順惟天祐善則慶餘諸郎君純孝根心孺  
慕成性棘人欒欒烏聞悲而欲下喪事總總樹染  
泪而先枯而且投筆材長請纓志就薇署珥毫素  
絲著委蛇之節熊幡佐郡甘棠留蔽芾之陰樂施  
予而不倦君子之澤流正行誼以維風通德之門  
著斯實廣譽施身訐謨以翼者矣愚發分惟具邇  
情若同生束髮盟心華顛堅契早共綢繆於隆替  
常賴匡植於險夸道相爲謀行無不與然鮒井終  
漏螳隧何支况發蒲質先零三名抱樸而吾弟松

姿彌茂四照分光時因江流有永開緘讀鯉腹之  
書日翼粉社重來握手聚鴈行之樂豈謂劒飛延  
浦笙響緱山惠衾已正不得伸哀曾篋長辭無由  
永訣遙歛目斷遠念肝摧今佳城就掩將同下馬  
之陵華表在瞻應返遼陽之鶴矧乃鼓鐘方奏祀  
列宮牆俎豆維新載在典禮信斯人之不朽垂奕  
禩而無窮但發孤竹空存莫共壘篋之貫枯桐半  
瘁孰協膠漆之堅悵斷金而執紼誼切於管鮑之  
生知痛埋玉以陳芻慟比於范張之死友嗚呼尚  
饗

維

康熙五十六年歲次丁酉十一月辛亥朔越十有  
二日癸亥愚再姪孫弘翰弘極謹以剛鬣柔毛清  
酌庶饗之奠致祭於

皇清誥封光祿大夫內閣中書加十二級景原太叔祖  
之靈而言曰嗚呼維昊天而降酷兮歎哲人之遽  
萎若指南之無車兮測景失其土圭舉世莫不哀  
傷兮撫余心而更悲望蕪城之寓第兮天黯慘以  
風淒想總帳之在設兮魂震蕩而目眇會靈車之  
返轡兮迺臨哭於路衢歷吳越以抵新都兮雲山  
綿邈以逶迤自宗黨以逮戚友兮素車千里以紛

馳我生不辰兮未獲追隨恭承嘉惠兮莫覩其儀  
念與我祖遊好兮輔之翼之繼垂手於吾父兮恩  
斯勤斯皓首彌篤兮義分不渝青睞獨殷兮所欲  
與聚而所惡勿施溝門祚之凋落兮公獨拯其顛  
危媿緒業之陵替兮公更爲之扶持煢煢雙節兮  
惟公是毗哀哀兩幼兮舍公何歸恩加三世兮生  
死不遺何以報德兮百生爲期佳城就掩兮永閔  
容輝儀牀載拜兮空瞻衮衣幸仁賢之繼志兮矜  
此仳離荷孝慈之述事兮終獲因依仰芳型兮覩  
金玉藉高蔭兮垂粉榆緬承恩於宿昔兮復希眷  
於來茲情愴况而無已兮言抑塞而曷據聊陳薄  
奠兮惟此清醴敬告微衷兮侑以蕪詞冀明靈之  
如在庶昭格而歆諸嗚呼哀哉尚

饗

祭輓續錄卷三

祭輓續錄卷四

輓詩

詹銓吉

先生字卜臣浙江遂安人官翰林院庶吉士

腰纏騎鶴兩相兼人共矜誇公未然留得家風師萬石  
里門先下敬鄉賢

憶昔披衷肅奏章老臣謀國慮何長天顏有喜邀殊

錫御墨常懸日月光

蘆荻蕭蕭水國秋邗江日暮碧雲愁素車白馬如流水

荔赤蕉黃薦未休

文昌高閣踞崔嵬挾雨蒼龍破壁飛公返玉京龍作駕

山頭何日鶴來歸

毛士銓

先生字

縣人徽州教授

虹

木壞山頽哲士歸同人誰不淚沾衣宗祠再建人爭羨  
聖廟重修世所稀排難仲連誇獨步義田文正實難  
幾其他善事焉能罄齎務持籌績豈微  
一束生芻奠几筵情因執紼覺淒然趨朝赴院稱雙壁  
扶襯還鄉慟四賢練水白雲迎遠旆邗江晴日送歸船  
他時濟濟皆繩武重疊焚黃到九泉

方天禩

先生字周下浙  
江遂安人孝廉

遼西世胄寄錢唐奕奕才華孰可當鹽筴時持充貢賦  
縹緲日檢動宮牆湖山自具雄都麗風月還思逸興長  
志在四方曾莫定爰從浙水過維揚

聲名早已著邗溝綜理齏商數十秋慷慨樂交天下士  
殷勤遍為里中謀九重呼籲陳時弊百萬蠲除沐  
帝庥莫道嘉猷成往事逢人說項至今留

瀟灑襟期七十年詒孫翼子自翛然海中有樹皆珠璣  
庭畔無蘭不玉妍趨闕喜能承誥勅分符雅足重旬  
宣崇封一品真殊遇次第金泥下九天

風雨蕭蕭正暮春蓬瀛遽返最傷神長雲黯澹隨隄畔  
靈旆蹁躑越水濱鶴至裴回迷舊地猿啼嗚咽集清晨  
諸郎忝託金蘭契回首先賢泪滿巾

梅鼎臣

先生字宅隣  
歙縣人孝廉

遐思高誼口碑陳愛禮名賢歷幾春專欲解紛肝膽照

無誇焚券抒懷真麥舟博濟貧寒戶寶劍多歸俠烈人  
一自中流頽砥柱至今不忍說前身

才足經綸信罔差洒然胸次擬雲霞已同陶猗趨仙島  
一並蘇韓擅大家冷落無聲江岸樹蕭條削色嶺梅花  
長沙一哭千年痛贏得青編姓字華

卓哉名譽播南州此日何期天上遊水月微茫琴石暗  
山雲飄忽野溪流森森庭砌培蘭玉渺渺音容歎隴丘  
仰止徒傷先哲往照顏古道自千秋

煮海匡時做計然忽聞驚賦玉樓篇仁風到處乾坤市  
俠骨生來遠邇傳無復閒庭論世道何堪大木折人天  
只今流水高山畔空有松林鶴唳烟

景物蒼茫事奈何邗江風雨肯蹉跎靈光未滅三更月  
雅度猶存千頃波青草叢中疑洞府白雲深處是烟蘿  
雖然緱嶺逍遙日正氣人間歲歲歌

江

倫

先生字冠羣  
歙縣人孝廉

超超名譽滿人寰儀表今傷杳莫攀已挽頽風維俗薄  
更流惠澤拯時艱紫泥重疊來天闕華表崢嶸映舊  
山道路送迎悲復泣邗江練水共潺湲

九重時復降鸞函俎豆黷宮恩寵覃至行世咸推第一  
達尊人共豔兼三詩追唐代稱宗匠書法王家示指南  
青史永堪垂不朽豈徒子姓盛華簪

沈廷瑞

先生號榜  
崖宣城人



者英久識地行仙詎意星文賈大年盛世 綸音邀寵  
賚高閱簪笏競蟬聯大阿銜掩還歸匣照乘光潛遽墮  
淵從此竹西歌吹散招魂誰續楚些篇

豈厭塵寰絕世緣經邦籌筴失名賢鶴歸華表傳丁令  
鯨去空江憶謫仙丹旒霜風還練水總帷燈火上吳船  
知君泉路應含笑他日重看畫錦鮮

汪良溥 再見

項公濟世才髫年丰骨清親族稱大器他年實國楨既  
長遠遊學落筆四座驚同學冢宰公摘詞相唱賡學成  
歸故鄉搏雲冲霄鳴每試輒冠軍拭目可登瀛既念儒  
者急養親須治生乃客淮南郡鹽筴爰經營一時群彦

服首座推公盟公益自謙讓小心竭寸誠衆商利與弊  
一一剖劃精至今五十年四海仰高名修祠揚祖德敦  
族見深情揮毫黑蛟走愛客芳樽盈自奉甘樸素重義  
兼金輕性復耽吟咏作詩比長城排空雲霞麗擲地金  
石聲人或得片紙珍重如瑤瓊吐論入經史清言晉賢  
弁 天子南巡日公共羣商迎上疏商困甦至誠感

聖明天恩沛四方錫爵四世榮繞膝有四傑才品俱崢  
嶸長君經濟學鳳池聽遷鶯仲君襟抱爽才大工治氓  
叔季復温雅文彩冠羣英往曾贈我詩五言欬吐成長  
孫亦舊好謀猷真老成其餘俱佳士學問有章程皆由  
公之教善後道久亨賤子挹清芬花宮曾識荆廿年蒙

教益哀公涕泪橫蕪詞上几筵寸心殊怍怍

李璟

憶昔先君子意氣尚敦篤平生幾交歡縷指盡耆宿先  
生名世賢古道異流俗以此結素心臭味同椒菊弘施  
經濟才恥談章句目謨猷制府欽偉議當途錄澤同江  
漢長恩比淮流沃令嗣悉英髦文壇擁巨燾已耀天衢  
驥駑駘愧塵逐方資耆舊型療我疎狂腹遽瞻鶴駕騰  
雲旌去不復驚呼泰岱頽大厦傾梁木今昔起哀吟俯  
仰空睇矚臨風一長歎涕泗堪盈掬

馬書思

先生字笏臣  
桐城人文學

人生天地等蜉蝣德業誰居最上頭如公發迹迴莫比

滌溪三面鍾奇尤水源百世謹霜露一庭無間名與譽  
時平才足搏風雲家饒快得敦情愫賢聲直突古今豪  
興酣落筆排春潮白髮還能效舞拜高風直令天珍勞  
夫何盈盈白雲鄉逍遙月落萎蘭房我憶公當海岳隨  
翱翔橫天倬漢昭文章置身碧落群仙傍風蕭森兮神  
飛揚漠漠山高水共長

吳吉

再見

寒風蕭瑟雲悠悠送先生兮歸故丘靈車高駕江上舟  
哀詞執紼盈道周薪盡火傳神自留應逐飛仙上下遊  
白鶴爲馭駟蒼蚪莖豪樹業光箕裘嗣賢濟濟麟鳳儔  
入掌絲綸出建旂况復偉畫資邊籌先生垂譽無時休

鍾靈本自黃山陬今歸黃山宅其幽長松白石同千秋  
我詞薤露心徒憂

党 燦

俠氣清風表招魂白日愁梅泉不復曉溪石咽寒流慘  
結玄霜暗情深紅葉秋德容今寂寞何處覓仙遊

吳肇鈞

天上玉樓改舊賦特頒瑤簡召才人為尋金闕煙霞侶  
拋却家鄉桃李春樹德有孫皆國士遺言教子作忠臣  
他時若過壠前拜劔掛松間伴石麟

舉世群欽三立全名成樂志在林泉掃苔伴石安茶竈  
渡水拈花上酒船黑髮從來無百壽青山歸去便千年

君藏古歛牛眠地更勝揚州好墓田

杜牧之詩人生只合揚州死禪智山

光好墓田

羅 鑽 先生字野真歛縣人文學

吾鄉前輩多英雋行誼如君不少慚 特賜衣冠居極  
品况承左右是奇男權衡 國課邀隆寵締造宮牆播  
嫩談將與昔賢同廟食也期執豆一披衫

王光宗

太丘鄉國共宗盟何事龍蛇奪老成寒谷待周常贈麥  
講堂重整輒傾簾森森玉樹凌雲秀習習槐聲繞閣生  
不日應來 丹鳳詔看將封石列佳城

江

駿 先生字初逸歛縣人

遣興排芳譽應爲一個臣清名難以喻湛露比其仁浩  
淼混無際滄桑徧有春茨簷悅且豫逢掖樂攸甄聖闕  
蔚乎制儒庠節然新 恩褒四世寵綸命一堂馴未結  
香山會而捐邗水濱陰雲多慘澹化日亦幽泯邈矣斯  
人去懷哉此道循鄉賢百代祀天地與同倫

蕭一標

先生字國表  
歙縣人文學

翠華南幸訪遺賢

行幄親承

天語宣聖代恩深容

角綺蒼生望重識彭佺丹楓搖落平山外白鴈淒清練  
水邊薤露歌殘霜月冷松楸故國晚含烟

許

瀾

先生字文濤  
歙縣人文學

平生道義喜相親孝友如公邁等倫却怪玉樓徵作賦

兩淮經濟少斯人

回思往事十年餘五馬筵中識面初文采風流今已矣  
少陵詩法右軍書

豪俠聲聞滿帝畿延賓不減鄭當時即今邗水留餘澤  
夏雨春風憶項斯

天顏一覲被恩光

御墨榮頒畫錦堂堂下有人承色

笑繡衣肩竝紫薇郎

家廟重新不論錢先人夢指得牛眠還師文正多遺劬  
子姓呶唔仗義田

古調於今不可尋碎寒有客謝知音故園親舊頭如雪  
賦罷招魂泪滿襟

膝下哀哀泣蓼莪麻衣時  
兒泪痕多更傳執紼臨岐日  
一路遙聞薤露歌

歛浦寒冬旅櫬歸舊山  
猿鶴仰清輝漆燈未滅留彬至  
應有佳城在翠微

畢雯

金莖曉瓊樹老慘西風斷  
鴈廣陵殘照故山烟靄迷丹  
旒經濟文章逢人說道  
親承三殿詔龍章鳳藻恩波

浩渺玉樓此日應含笑  
薇署佳兒疊封花誥

調惜瓊花

朱振元

鬢發霜天夜氣清  
哀歌薤露度層城  
山容慘澹波光斂  
多士咸嗟失旦評  
先生素行追皇古  
醇厚簡默昭懿矩

真誠待物久不移  
俗態紛紜安足數  
繡衣八使日停輪  
諮訪利弊悉敷陳  
碩畫鴻猷垂不朽  
同儕讓善每逡巡  
歲月彌高德彌劭  
意氣襟懷邁等倫  
少微星隕芳蹤杳  
士林相望河山邈  
中流砥柱復何人  
允矣獨行誰同調

吳寬

天地何浩浩偉人特鍾英  
生爲河之砥歿遺邦之程孝  
友根諸性淹通緣學成家承  
二酉祕曾有五車盈白鳳  
出其口采筆何縱橫賦作金  
聲妙書傳鐵畫精格言常  
在手力學無倦萌練溪垂模  
楷隋苑藉稱聲尚義周親  
黨種德概生平自爾干門大  
帝眷來殊榮況復興賢  
切洪功獨力擎宮牆皆繕葺  
鼓舞及儒生修文今赴召

感慕徧山城靈輻還桑梓薤露動蛩鳴祀享鄉賢右千  
秋識芳名媿我生也晚追仰有餘情

吳泓

道院曾親長者顏廿年企慕未能刪每從祭酒稱彌甚  
因悉封公德莫攀榻下南州迷練浦樽開北海隔黃灣  
於今素旒迴珂里薤露悲吟出竹關

濟濟邗江豔麗場何如歿後祀宮牆春秋嚮曙冠裳肅  
俎豆生輝荇藻香棟宇振興宣教地英才陶淑毓賢鄉  
先生不朽遺芳躅佑啓來茲慶澤長

鮑蕃祚

獨抱古人心聲華冠古今交遊傾九牧然諾重千金孝

友貽謀遠詩書舊澤深典型今渺矣悵望一沾襟

潘珩

猶憶當年同受業君承道學早蜚聲持籌爲國勤勞著  
借帑蘇商科額盈仁念格天榮令嗣德音震地播芳名  
近時碩彥奚多此一束生芻涕泪橫

汪棻

聖門高弟子肘見常衣鶉紛華都不事近道只因貧必  
貧斯近道迂論安足云富而能好禮富亦非浮雲慷慨  
唯好義施濟匪干名如何方式燕遽爾喪儀型歌謠瘖  
孺子望旒涕沾纓

汪由憲

俗夫求福利兼金造淋宮浮圖矗雲表癡惑填心曾佛  
道無君父名教所不容孰如肯堂構鼓鐘同辟雍瑤階  
琢肪玉畫棟凌蒼松功成方不日楹奠已先從斯宜孫  
子慶 紫誥疊膺封

釋實贊 再見

忽聞丹旆返新安回首生平鼻轉酸山路迂迴支短杖  
溪流曲折涉層灘人如靈運方明佛品似陶潛不著官  
膝下孫曾多鵲起九原含笑慶彈冠

姪鳴臯

字幼荀  
文學

聲稱籍甚徧寰區德業超羣曠代無首出訐謨 恩賚  
渥四膺 錫命秩階殊郎君將補山龍袞子姓多分銅

虎符諸福備臻懷樂只仙踪忽逝問方壺

自櫻兵燹歎丘墟崛起英賢復舊廬祖廟重新歌合饗  
石隄底定慶安居詩書樂育崇鄉校族黨後蘇賴社儲  
俎豆宮牆真盛事希文媲美信無虛

姪孫善辭

字載遠  
文學

連朝露冷星微暗思情事真堪異春風到處生花拂柳  
都成勝麗遺愛猶存水流川逝又何勞計但揚州夢醒  
臺空鶴去至今墮人清淚 不惜吾身生晚歎年來老  
成凋敝重過故里試看亭館欲荒苔砌始信仙班招回  
舊侶豈留塵世莫認也富貴浮雲誤却本來根蒂

調水  
龍吟

姪孫廷器

地望羣推一族良胡然霄漢忽翱翔德隆自足追隨實  
品重由來竝彥方梁木已摧感涕泣泰山何在共悲傷  
臨風有淚空翹首執紼無從限阻長

祭輓續錄卷四





